



### 3. Tschanteda dal cussagl cumünel in marcudli, ils 6.2.2013 a las 19.00 in chesa cumünela S-chanf

**Presidi:** Duri Campell

**Preschaints:** Gian Andrea Bott, Ines Barblan, Gian Fadri Largiadèr, Paolo Bernasconi

**Absaints:**

**Actuar:** Duri Schwenninger

---

#### Tractandas:

1. Protocol
2. 0.211 Dumandas da fabrica
3. 7.200 Surdeda da lavuors nouv tet deposit d'immundizchas Serlas
4. 0.212 Publicher piazza per ün giarsun rasgeder da laina d'industria
5. 0.122 Tscherner commembers cumischiun per preparar concept per collavuraziun reviers forestels, mantegnimaint da vias ed infra-structuras (ovas e chnalisaziun) traunter las vschinaunchas S-chanf e Zuoz
6. 0.123 Delegaziun radunanza generela da las OEE a Zernez
7. 0.112 Votumaziuns dals 3 marz 2013, büro electorel
8. 9.999 Varia

La glista da tractandas vain approveda sainza objecziuns.

**Protocol:** Il protocol da la tschanteda dals 22.01.2013 vain approvo unanimamaing.

#### **8 0.211 Dumanda da fabrica Dumanda per tolerer ütilisaziun local cun scumand d'abiter / surpassamaint da la ledscha da fabrica**

Tar la collaudaziun dal fabricat ho la cumischiun da fabrica constatto, chi'd es gnieu erret üna finestra tar la stauza cun ün scumand d'ütilisaziun e quella d'eira gnida zuppanteda cun üna construcziun provisorica. L'uffizi per il svilup territoriel vaiva concess il permiss da fabrica BAB cun la cundiziun, cha la stauza surnummeda stu gnir registreda i'l cudesch fundiari cun ün scumand d'abiter. Quella decisiun es leghelmaing valabla e la registraziun es gnida executeda. Poch zieva la collaudaziun ho la cumischiun pudieu alura constatter, cha'l patrun da fabrica vaiva darcho avrieu la finestra sainza il permiss da fabrica. In seguit s'ho pretais üna dumanda da fabrica zievatiers e l'an passo ho il cussagl refüso quella ed

ho invio la procedura tenor artichel 61 al. 3 da l'uorden davart la planisaziun dal territori per restabilir al stedi leghel. In seguit s'ho do als proprietaris la pussibilted da s'exprimer in chosa. Quels haun alura inoltro üna dumanda, cha' l' cussagl dess tolerer l'utilisaziun. Our da motivs dal trattamaint eguel ed our da motivs da pregüdizi decid'il cussagl cun 3 cunter 2 vuschs da refüser la dumanda. Impü decid'il cussagl cun 3 cunter 2 vuschs da multer il surpassamaint tenor artichel 95 alinea 1 da la ledscha davart la planisaziun dal territori per il chantun Grischun (KRG) cun fr. 10'000.00, siand cha' l' fabricat es gnieu erret cun intenziun e mmand in erramaint als officiants.

**9      0.211      Dumanda da fabrica  
Restabilir giatters davaunt las fnestras tenor sentenzcha dal  
güdisch administrativ**

Il cussagl vaiva refüso la dumanda zievatiers per munter giatters davaunt las fnestras. In seguit haun ils patrums da fabrica fat plaunt cunter la decisiun dal cussagl tal güdisch administrativ. Quel ho alura confermo la decisiun dal cussagl. Zieva cha la sentenzcha dal güdisch es leghelmaing valabla, stu gnir restablieu il fabricat i'l stedi leghel. Il cussagl decida cun 4 cunter 1 vusch da pretender cha'ls giatters davaunt las fnestras vegnan restablieus in stedi leghel. Impü decid'il cussagl cun 4 cunter 1 vusch d'introdür la procedura da multa.

**10      7.200      Alluntanamaint da las immundizchas  
Surdeda da lavuors nouv tet deposit d'immundizchas Serlas**

Il cussagl piglia cugnuschentscha da 2 offertas per eriger ün nouv tet tal deposit d'immundizchas in Serlas, illa zona da misteraunza. Il cussagl decida unanimamaing da surder la lavur a la firma Markus Frank da Chapella per l'import offert da fr. 8'655.20, inclus l'imposta sülla püvalur. Tar la surdeda da la lavur es gnida resguardeda l'offerta la pü favuraivla.

**11      0.212      Persunel  
Publicher piazza per ün giarsun rasgeder da laina d'industria EFZ**

L'an passo s'ho fat adüna darcho inserats per chatter ün giarsun rasgeder. Dischplasmaing nu sun entredas üngünas annunzchas. Il cussagl decida unanimamaing da scriver our aunch'üna vouta la piazza da giarsunedi in l'internet, illas chaschas nairas scu eir in scoula da La Plaiv ed in scoula a Zernez.

**12      0.122      Cumischiuns  
Tscherner commembers cumischiun per preparar concept per  
collavuraziun reviers forestels, mantegnimaint da vias ed infra-  
structuras (ovas e chnalisaziun) traunter las vschinaunchas  
S-chanf e Zuoz**

Siand chi nu s'ho pudieu occuper la piazza dal mneder tecnic ed infrastructuras s'ho piglio sü contact cul cussagl cumünel da Zuoz per invier üna collavuraziun tres las duos vschinaunchas. L'eivna passeda ho gieu lö üna tschanteda cumünaivla dals 2 cussagls e lo s'ho decis da perseguiter la varianta da s-chaffir üna gruppa da god ed üna gruppa d'infrastructuras/vias sur tuottas duos vschinaunchas. In ün prüm pass s'ho decis da s-chaffir üna cumischiun chi prepara ün concept. Il cussagl decida unanimamaing da tscherner per nossa vschinauncha illa cumischiun ils duos depütos pertuchos, Gian Andrea Bott e Gian Fadri Largiadèr.

**13 0.123 Delegaziuns  
Delegaziun radunanza generela da las OEE a Zernez**

A la radunanza generela da las OEE chi ho lö als 22 favrer 2013 a Zernez piglian part per nossa vschinauncha: Duri Campell, Gian Andrea Bott e Duri Schwenninger.

**14 0.112 Votumaziuns  
Votumaziuns dals 3 marz 2013, büro electorel**

Al büro electorel per las votumaziuns federelas e chantunelas dals 3 marz 2013 faun part: Duri Campell, Gian Fadri Largiadèr e l'actuar Duri Schwenninger.

**15 9.999 Varia**

Il depüto da la scoula infurmescha, cha la cumischiun chi ho l'incumbenza da mner tres la revaisa da l'uorden da scoula ho decis da spetter giò fin cha'l muoster da la nouva ledscha dal chantun es avauntmaun. Uossa es quella avauntmaun e la cumischiun piglia sü darcho la lavur. Impü infurmescha'l, cha la cumischiun ho constatto, chi füss d'adatter al medem temp eir ün'artichel i'ls tschantamaints. Inavaunt infurmescha'l cha Flurin Parolini da Scuol es gnieu tschernieu scu successur da la magistra Victoria Mosca. Il nouv tschernieu cumainza sieu impieghi tar nossa vschinauncha il cumanzamaint da l'an da scoula 2013/2014.

Il president infurmescha, cha'l departamaint da construcziun, trafic e silvicultura ho prolungieu il termin per las imsüras da cumpensaziun regard il permiss per la runcheda in Bos-chetta Plauna, tar la zona resgia e magazin forestel, fin ils 31.03.2014. Fin quel termin ho il cussagl da suottametter a l'uffizi da god e prievels da la natüra ün projet.

Impü infurmescha'l da las trattativas regard il surpiglier l'implaunt electric sün nos territori cumünel. In marz haun lö las ultimas trattativas culs respunsabels da la REpower SA regard il predscha a cumpra.

Il president infurmescha, cha la prosma radunanza cumünela ho lö ils 27 marz 2013.

Il depüto ambiaint e planisaziun orientescha cha la fasa 2 dal plan generel da drenascha (GEP) es glivreda.

A las 21.50 vain la tschanteda alveda.

In buna fè

L'actuar:  
**D. Schwenninger**